

山東通志


卷三十五之十三

內閣文庫			
漢書類	三九六九	三九六九	三九六九
架	冊	號	類
四函	六九二		
七架			

內閣文庫			
漢書類	三九六九	三九六九	三九六九
架	冊	號	類
元二函	六九二		
二架			
(三七三)			

內閣文庫		
番號	漢	3969
冊數	692 (373)	
函號	291	97

三七三



淺草八章

窮年白首迄乎六朝雲擾南北中分章句好尚互有偏執南
人簡約得其精華北學深蕪窮其枝葉以至正義辨於貞觀
禮詳於永徽端拱咸平復加較正經傳註疏始成全帙蓋
桃弧棘矢葦路籃縷以啓山林莫喻其勞而典章名物草木
鳥獸字析句比雖縑人治絲鍼人治組天官之九野三垣建
章之千門萬戶莫喻其詳且密也而士苟志在稽古正學則
舍此何適矣然學士或白首不見全書卽辟雍之籍蠹老塵
封齋受誦讀卒業者闕焉又或譌謬相衍牴牾不保讀之如
含瓦石毛生茲刻獨爲完善於以羽翼聖經有功於王者表
章之事者也且此書之聚訟亦從來多故矣十翼後先象象

分合孰是孰非孔壁伏書古今何辨幽何別乎雅頌衛邶鄘何分關雎盛衰安昉冬官何關考工何補職方禹服山川曷據王制月令漢儒何以附會夏時周月正朔焉憑膏盲墨守廢疾之論三傳優劣胡爲紛紛以至詩之有齊魯韓內外易之有施孟梁邱京氏書之有歐陽大小夏侯禮之有大小戴春秋之有吳助何存者什一亡者什九疑信廢興斯編具在昔人云聖人之經昭若日月而先儒又謂六經註我我註六經夫以人心自有之六經而窺乎日月我註註我正復不隔誠好學深思以探其意又安在漢人窮經而經亡哉故曰六經載道之文能觀聖人作經之意知爲儒者希天之業也嗚呼深遠矣漢博士以五經待詔每國有大政大疑則各以所名一經奏斷而朝廷稱制決焉雋京兆處衛太子事雖復引義不精而猶能援古決疑倉卒定變况其果能以禹貢治河以春秋折獄以三百篇當諫書以周禮致太平以論語半部佐定天下者哉則其窮經致用執此以往有不可勝用者矣嗟乎毛氏一經之功臣也漢有二毛其苗裔乃能合十三經而日星之其亦可謂淹雅綜勤有志表章豈特爲海虞稽古正學之一人哉

儀禮鄭註句讀序

國朝張爾岐

在昔周公制禮用致太平據當時施於朝廷鄉國者勒爲典

籍與天下共守之其大體爲周官其詳節備文則爲儀禮周德旣衰列國異政典籍散亡獨魯號秉禮遺文尙在孔子以大聖生乎其地得其書而學焉與門弟子修其儀定其文無所失墜子思曰仲尼祖述堯舜憲章文武孔子亦自曰吾學周禮今用之吾從周文王旣沒文不在茲乎並謂此也秦氏任刑廢禮此書遂熄漢初高堂生傳儀禮十七篇武帝時有李氏得周官五篇河間獻王以考工補冬官共成六篇奏之後復得古經五十六篇於魯淹中其中十七篇與高堂生所傳同餘三十九篇無師說後遂逸漢志所載傳禮者十三家其所發明皆周官及此十七篇之旨也十三家獨小戴大顯

近代列於經以取士而二禮反日微蓋先儒於周官疑信各半而儀禮則苦其難讀故也夫疑周官者尙以新室荆國爲口實儀禮則周公所定孔子之所述當時聖君賢相士君子之所尊行可斷然不疑者而以難讀廢之可乎愚三十許時以其周孔手澤慕而欲讀之讀莫能通旁無師友可以質問偶於衆中言及或阻且笑之聞有朱子經傳通解無從得其傳本坊刻考註解詁之類皆無所是正且多謬誤所守者唯鄭註賈疏而已註文古質而疏說又漫衍皆不易了讀不數緡輒罷去至庚戌歲愚年五十又九歲矣勉讀閱六月乃克卒業焉於是取經與註章分之定其句讀疏則節錄其要取

足明註而止或偶有一得亦附於末以便省覽且欲公之同志俾世之讀是書者或少省心目之力不至如愚之屢讀屢止久而始通也因自嘆曰方愚之初讀之也遙望光氣以爲非周孔莫能爲已耳莫測其所言者何等也及其矻矻讀之已又默存而心歷之而後其俯仰揖遜之容如可睹也忠孝藹惻之情如將遇也周文郁郁其斯爲郁郁矣君子彬彬其斯爲彬彬矣雖不可施之行事時一神往焉彷彿戴弁垂紳從事乎其間忘其身之喬野鄙僿無所肖似也使當時遇難而止止而竟止不幾於望辟雖之威儀而却步不前者乎噫愚則幸矣願世之讀是書者勿徒憚其難也

藝文七 贊

管仲晏嬰傳贊

史記

司馬遷

太史公曰吾讀管氏牧民山高乘馬輕重九府及晏子春秋詳哉其言之也既見其著書欲觀其行事故次其傳至其書世多有之是以不論論其軼事管仲世所謂賢臣然孔子小之豈以爲周道衰微桓公既賢而不勉之至王乃稱霸哉語曰將順其美匡救其惡故上下能相親也豈管仲之謂乎方晏子伏莊公尸哭之成禮然後去豈所謂見義不爲無勇者邪至其諫說犯君之顏此所謂進思盡忠退思補過者哉假令晏子而在余雖爲之執鞭所忻慕焉

孟子傳贊

史記

司馬遷

太史公曰余讀孟子書至梁惠王問何以利吾國未嘗不廢書而歎也曰嗟乎利誠亂之始也夫子罕言利者當防其原也故曰放於利而行多怨自天子至於庶人好利之弊何以異哉

田單傳贊

史記

司馬遷

太史公曰兵以正合以奇勝善之者出奇無窮奇正還相生如環之無端夫始如處女適人開戶後如脫兔適不及距其田單之謂邪

劉敬叔孫通傳贊

史記

司馬遷

太史公曰語曰千金之裘非一狐之腋也臺榭之榱非一木之枝也三代之際非一士之智也信哉高祖起微細定海內謀計用兵可謂盡之矣然而劉敬脫輓輅一說建萬世之安智豈可專邪叔孫通希世度務制禮進退與時變化卒為漢家儒宗大直若拙道固委蛇蓋謂是乎

公孫弘傳贊

史記

司馬遷

太史公曰公孫弘行義雖修然亦遇時漢興八十餘年矣上方鄉文學招俊乂以廣儒墨弘為舉首主父偃當路諸公皆譽之及名敗身誅士爭言其惡悲夫太皇太后詔大司徒大司空蓋聞治國之道富民為始富民之要在於節儉孝經曰

安上治民莫善於禮禮與奢也寧儉昔者管仲相齊桓霸諸侯有九合一匡之功而仲尼謂之不知禮以其奢泰侈擬於君故也夏禹卑宮室惡衣服後聖不循由此言之始之盛也德優矣莫高於儉儉化俗民則尊卑之序得而骨肉之恩親爭訟之原息斯乃家給人足刑措之本也歟可不務哉夫三公者百寮之率萬民之表也未有樹直表而得曲影者也孔子不云乎子率以正孰敢不正舉善而教不能則勸維漢興以來股肱宰臣身行儉約輕財重義較然著明未有若效丞相平津侯公孫弘者也位在丞相而爲布被脫粟之飯不過一肉故人所善賓客皆分奉祿以給之無有所餘誠內自克約而外從制汲黯詰之乃聞於朝此可謂減於制度而可施行者也德優則行否則止與內侈泰而外爲詭服以釣虛譽者殊科以病乞骸骨孝武皇帝卽制曰賞有功褒有德善善惡惡君宜知之其省思慮存精神輔以醫藥賜告治病牛酒羅帛居數月有瘳視事至元狩二年竟以善終至相位夫知臣莫若君此其效也弘子度嗣爵後爲山陽太守坐法失侯夫表德章義所以率俗厲化聖王之制不易之道也其賜引後子孫之次當爲後者爵關內侯食邑三百戶徵詣公車上名尚書朕親臨拜焉

董仲舒傳贊 前漢書

班固

贊曰劉向稱董仲舒有王佐之才雖伊呂亡以加管晏之屬伯者之佐殆不及也至向子歆以為伊呂乃聖人之偶王者不得則不興故顏淵死孔子曰噫天喪予惟此一人為能當之自宰我子貢子游子夏不與焉仲舒遭漢承秦滅學之後六經離析下帷發憤潛心大業令後學者有所統一為羣儒首然考其師友淵源所漸猶未及乎游夏而曰管晏弗及伊呂不加過矣至向曾孫龔篤論君子也以歆之言為然

章賢傳贊

前漢書

班固

司徒椽班彪曰漢承亡秦絕學之後祖宗之制因時施宜自元成後學者蕃滋貢禹毀宗廟匡衡改郊兆何武定三公後皆數復故紛紛不定何者禮文缺微古今異制各為一家未易可偏定也考觀諸儒之議劉歆博而篤矣

蕭望之傳贊

前漢書

班固

贊曰蕭望之歷位將相藉師傅之恩可謂親昵亡間及至謀泄隙開讒邪構之卒為便嬖宦豎所圖哀哉不然望之堂堂折而不撓身為儒宗輔佐之能近古社稷臣也

鄭康成傳贊

後漢書

范蔚宗

論曰自秦焚六經聖文埃滅漢興諸儒頗修藝文及東京學者亦各名家而守文之徒滯固所稟異端紛紜互相詭激遂令經有數家家有數說章句多者或乃百餘萬言學徒勞而

少功後止疑而莫正康成括囊大典網羅家家刪裁繁蕪刊
改漏失自是學者略知所歸王父豫章君每考先儒經訓而
長於康成常以為仲尼之門不能過也及傳授生徒竝顯以
鄭氏家法云

東平王東海王傳贊

後漢書

范蔚宗

論曰孔子稱貧而無諂富而無驕未若貧而樂富而好禮者
也若東平憲王可謂好禮者也若其辭至戚去母后豈欲苟
立名行而忘親遺義哉蓋位疑則隙生累近則喪大斯蓋明
哲之所為歎息嗚呼遠隙以全忠釋累以成孝夫豈憲王之
志哉東海恭王遜而知廢為吳太伯不亦可乎

孔融傳贊

後漢書

范蔚宗

論曰昔諫大夫鄭昌有言山有猛獸者黎藿為之不採是以
孔父正色不容弑虐之謀平仲立朝有紆盜齊之望若夫文
舉之高志直情其足以動義概而忤雄心故使移鼎之迹事
隔於人存代終之規啟機於身後也夫嚴氣正性覆折而已
豈有員園委曲可以丐其生哉懍懍焉嗃嗃焉其與琨玉秋
霜比質可也

諸葛亮傳贊

後漢書

晉

陳壽

評曰諸葛亮之為相國也撫百姓示儀軌約官職從權制開
誠心布公道盡忠益時者雖仇必賞罹法怠慢者雖親必罰

服罪輸情者雖重必釋游詞巧飾者雖輕必戮善無微而不賞惡無纖而不貶庶事精鍊物理其本循名責實虛偽不齒終於邦域之內咸畏而愛之刑政雖峻而無怨者以其用心平而勸戒明也可謂識治之良才管籥之亞匹矣然連年動衆未能成功蓋應變將略非其所長歟

羊祜傳贊

晉書

唐史臣

史臣曰秦始之際神祇呈貺羊公起平吳之策其見天地之心焉昔齊有黔夫燕人祭北門之鬼趙有李牧秦王罷東井之勢桑枝不競瓜潤空慙垂大信於南服傾吳人於漢渚江衢如砥襁袂同歸而在乎成功弗居幅巾窮巷落落焉其有

風颺者也

王導傳贊

晉書

唐史臣

史臣曰原夫典午發蹤本於陵寡金行撫運無德在時九土未宅其心四夷已承其弊既而中原蕩覆江左嗣興兆著元石之圖乖少康之祀夏時無思晉之士異文叔之興劉輔佐中宗艱哉甚矣茂弘策名枝屏叶情交好負其才智恃彼江湖思建克復之功用成翌宣之道於是王敦內侮憑天邑而狼顧蘓峻連兵指宸居而隼擊實賴元宰固懷匪石之心潛運忠謨竟剪吞沙之寇丹誠貫日主垂餌以終全貞志陵霜國綴旒而不滅觀其開設學校存乎沸鼎之中爰立章程在

乎櫛風之際雖則世道多故而規模弘遠提挈三世終始一心稱為仲父蓋其宜矣

王羲之傳贊

晉書

唐太宗御製

制曰書契之興肇乎中古繩文鳥跡不足可觀末代去朴歸華舒牋點翰爭相誇尚競其工拙伯英臨池之妙無復餘蹤師宜懸帳之奇罕有遺跡逮乎鍾王以降略可言焉鍾雖擅美一時亦為迥絕論其盡善或有所疑王於布織濃分疎密霞舒雲卷無所間然但其體則古而不今字則長而逾制語其大量以此為瑕獻之雖有父風殊非新巧觀其字勢踈瘦如隆冬之枯樹覽其筆蹤拘束若嚴家之餓隸其枯樹也雖槎枿而無屈伸其餓隸也則羈羸而不放縱兼斯二者故翰墨之病歟子雲近出擅名江表然僅得成書無丈夫之氣行行若縈春蚓字字如縮秋蛇臥王蒙於紙中坐徐偃於筆下雖禿于兔之翰聚無一毫之筋窮萬穀之皮斂無半分之骨以茲播美非其濫名邪此數子者皆譽過其實所以詳察古今研精篆素盡善盡美其惟王逸少乎觀其點曳之工裁成之妙烟霏露結狀若斷而還連鳳翥龍蟠勢如邪而反正翫之不覺為倦覽之莫識其端心慕手追此人而已其餘區區之類何足論哉

徐陵傳贊

陳書

唐姚思廉

史臣曰徐孝穆挺五行之秀稟天地之靈聰明特達籠罩今古及締構興王遭逢泰運位隆朝宰獻替謀猷蓋亮直存矣孝克砥身厲行養親逾禮亦參閔之志歟

馬周傳贊

唐史

宋 歐陽修

贊曰周之遇太宗顧不異哉由一介草茅言天下事若素宦於朝明習憲章者非王佐才疇以及茲其自視與築巖釣渭亦何以異迹夫帝銳於立事而周所建皆切一時以明佐聖故君宰間不膠漆而固恨相得晚宜矣然周才不逮傳說呂望使後世未有述焉惜乎

崔羣傳贊

唐文

宋 歐陽修

贊曰聖人不畏多難畏無難何哉多難之世人人長慮而深謀日惕於中猶以為未也曰吾覆亡不暇又何以安故能舉天下付之興畏之也禍難已平上恬下嬉施施自如曰賢難得雖無賢尚可治也佞可去雖存佞不遽亂也視漏弗填忽傾弗支偃然自慰曰我曷以喪故能舉天下付之亡不畏也常人所畏聖人易之所不畏聖人難之觀孝明皇帝本中主遭變可與謀始持成不可與共終崔羣以為相李林甫則治亂已分其言信哉是扁鵲所以謂桓侯也

孔道輔等傳贊

宋史與鞠詠劉隨曹修古郭勸段少連同贊

元 脫 脫

論曰古人有言山有猛獸藜藿為之不採當天聖明道間天

子富於春秋母后稱制而內外肅然紀綱具舉朝政無大闕失奸人不得以自肆者由言路得人故也是時孔道輔鞠詠劉隨曹修古迭為諫官御史郭勸段少連繼之皆侃侃正色遇事輒言雖被斥逐不更其守及帝既親政道輔勸少連復任言責郭后之廢引議慷慨犯人主責大臣其氣益壯遺風餘烈天下至今稱之詩所謂邦之司直其庶幾歟

范仲淹純仁傳贊 宋史

元脫 脫

論曰仲淹初在制中遺宰相書極論天下事他日為政盡行其言諸葛孔明草廬始見昭烈數語生平事業備見於是豪傑自知之審類如是乎攷其當朝雖不能久然先憂後樂之志海內固已信其有弘毅之器足任斯責使究其所欲為豈讓古人哉純仁位過其父而幾有父風元祐建議攻熙豐太急純仁抹蔡確一事所謂謀國甚遠當世若從其言元祐黨錮之禍不至若是烈也仲淹謂諸子純仁得其忠純禮得其靜純粹得其略知子莫若父哉


張曄張行簡傳贊 金史

元脫 脫

贊曰張曄行簡世為禮官世習禮學其為禮也行於家庭講於朝廷施用於隣國無不中度古者官有世掌學有專門金諸儒臣惟張氏父子庶幾無愧於古乎

尼父贊

漢張超



巖巖孔聖異世稱傑量合乾坤明參日月德被八荒名充遐
外終於獲麟遺歌魯衛

顓頊贊

魏曹植

昌意之子祖有軒轅始誅九黎水德統天以國為號風化神
宣威暢八極靡不祇虔

帝堯贊

魏曹植

大德統位父則高辛克平共工萬國同塵調適陰陽其惠如
春巍巍成功配天則神

帝舜贊

魏曹植

顓頊之族重瞳神聖克協頑瞽應唐涖政除凶舉俊以齊七
政膺歷受禪顯天之命

正考父贊

魏王粲

恂恂正父應德孔盛身為國卿族則公姓年在耆耄三葉聞
政誰能不迨申茲約敬饘粥予口偃僂受命名書金鼎祚及
後聖

孔子贊

晉陸機

孔子睿聖配天弘道風扇元流思探神寶明發懷周興言謨
老靈魄有行言觀蒼昊青歌先成丹書有造

尼父贊

晉孫楚

皇矣尼父聖哲之傑德比天地明齊日月周室凌遲大道蕪

穢禮樂崩阻姦雄罔世乃養門徒廣延俊又垂訓列國頌聲
魯衛威振夾谷義壓陳蔡德之休明幽而彌泰超美三代風
馳雲邁

孔子贊

晉 湛方生

文王既歿微言將墜邈哉孔公龍見九二闡化繫象素王洙
泗發揮中葉道映周季

顏子贊

晉 夏侯湛

知彰知微體深研幾明象介石量同聖師探賾罔滯在言靡
遺仰諸惟高瞻之攸希

閔子贊

晉 夏侯湛

聖既擬天賢亦希聖蒸蒸子騫立體忠正于祿辭親事親盡
敬勉心景迹擢辭流詠

左邱明贊

晉 夏侯湛

世亂讒勝君子道憂邱明達聖致志春秋微言逃難旁行不
流庶幾斯文希志訓猷

管仲贊

晉 夏侯湛

堂堂管生志存興仁仁道在己唯患無身苞辱遠害思濟彝
倫心寄鮑子動成生民

鮑叔贊

晉 夏侯湛

鮑子愔愔式昭德音交繆敬叔二人同心厥芳猶蘭其堅如

金遙遙景迹君子攸欽

魯仲連贊

晉 夏侯湛

我我先生有邈其節成仁憂亂抗道自潔隨事抑揚與時開
闔在幽能泰處悶惟悅

魯敬姜贊

晉 左芬

邈矣敬姜含德之英於行則高於理斯明垂訓子宗厲發奇
聲宣尼三歎萬代遺馨

接輿妻贊

晉 左芬

接輿高潔懷道行謠妻亦水清同味元昭遺俗榮津志遠神
遼

孟母贊

晉 左芬

鄒母善導三徙成教鄰止庠序俎豆是効斷機激子廣以墳
奧聰達知禮敷述聖道

齊杞梁妻贊

遭運不改逢時險屯夫卒莒場郊弔不賓哀崩高城訴情穹
旻遂赴淄川託軀清津

齊義繼母贊

晉 左芬

聖教元化禮貴信誠至哉繼母行合典經不遺宿諾義割私
情表德來裔垂則後生

班婕妤贊

晉 左芬

恂恂班女恭讓謙虛辭輦進賢辯祝理誣形圖丹青名伴樊
虞

任太常贊

晉 孫 綽

海岱協靈育此多士峩峩君侯東國之紀金德發耀英風邵
起文齊游夏行儔魯史有邈其聲令聞不已人亦有言德崇
譽高束帛旣延旌節仍招儀型朝堂流風丹青將振華袞冰
渙皇朝上帝靡盬曾不遐齡衛霍頽鎮哲人其傾邦國殄瘁
縉紳喪情仰企高範永播休聲

夷齊贊

晉 陶 潛

二子讓國相隨海隅天人革命絕景窮居採薇高歌慨想唐

虞貞風凌俗爰感懦夫

周公戒伯禽

南北朝 庾 信

伯禽居魯鳴玉來朝周公政治爲國風謠北山有梓南山有
喬禮容雖備俯仰無驕

師尙父授丹書

庾 信

尙父一遇周王是親赤雀旣下丹書已陳自論秉鉞長別垂
綸獨有磻石畱名渭濱

夫子見程生

有傾蓋亭

庾 信

程生夫子一遇相知薄言傾蓋桑陰遂移清揚共羨賢聖同
羈陳詩難別贈絹傷離

榮啓期三樂 在古成邑

庾信

榮期三樂惟人與年夫子相遇卽以爲賢性靈造化風雲自然雅琴雖古獨有鳴弦

延陵季子遇徐君 有掛劍臺

庾信

徐君有禮季子惟賢經過一遇如舊識然人非別後心許生前長松雖合寶劍猶懸

張良遇黃石公 黃石在穀城縣

庾信

張良取履跣投無辭兵書一卷長者二期昔稱韓相今爲帝師穀城黃石還歸舊祠

朱雲折檻 雲魯人

庾信

上書直諫有怙明君先求斬馬遂請龜文身摧欄檻義烈風雲應從御史翻賴將軍

王祥扣冰魚躍 祥臨沂人

庾信


王祥之母祥鱗是求冰連釣浦凍塞寒流精誠有感無假沉鈞二老同膳雙魚共浮

曾子贊 唐 蘓頌

百行之極三才以教聖人敘經曾氏知孝全謂手足動稱容貌事親事君是則是效

管敬仲贊 唐 蘓頌

小白圖霸尊周服楚聿求仁智扶我此舉叔牙知人拔管於



魯一言而合爰制師旅布命諸侯威行九土周王南面列國
來朝朝服濟河心無動搖束髮左衽遷乎一朝邢歸魏存楚
貢苞茅懸車北討山戎遁逃三歸備職不足累德七子仕楚
後人霑臆

管幼安贊

唐 蘓 頌

我蠶我衣我耕我食推心而動神佐正直溟波不沉仗此之
力島夷卉服移我淳德衡門棲遲臺佐讓職時非吾世語不
如默

二疏贊

唐 權德輿

靜專動植惟乾之德酌用不窮君子中庸矯矯二疏知微知
終功成不居父子清風天子賜金郡公出祖都門之美焯映
千古優游衡門棲息化源日飲醇耐心閑道尊人或言利利
令智昏清行素風可貽子孫萬物營營吉凶相生環中之樞
泊然遺行中林寂寥幽蘭自榮雖有贈繳不羈冥冥知止不
殆吉先烟戒賢哉大夫終始無悔

劉淪公政會贊

唐 呂 溫

河出崑崙來潤中夏連山合沓橫擁其派巨濤勃然手擘太
華決流東注功竝造化粵我聖唐將舉晉陽帝命是將往拯
溺於四方亦旣載旆亦旣秉鉞強克當路拒不得發淪公慷
慨感義激節用竒制變大事立決雷奮電越天衢八達則莫

我敢過如同霧破山河勢始豁赫矣渝公與神齊烈跡如仙
掌炯炯不滅

強克謂王威高君雅

李英公勅贊

唐 呂 溫

橫流莫極大亂無象英公傑出應運為將與楚楚霸與漢漢
王天時人事隨我所向長蛇縱蠹東據河洛婪婪封豕來濟
同惡號吼連聲如雷如霆萬里震驚時維英公諒我太宗斬
豕以趨取蛇於穴乃定九鼎乃開明堂奄有大邦金甲同光
告成於王皇業用昌帝命英公北伐獫狁雷鼓殷殷旄頭幾
殞掃雲黑山布庚陽春五原草綠不見南牧島夷來庭天子
親征其鋒惟英莫拒莫抗是震是蕩破東海浪天下既和解
鞍投戈袞服委虵華髮皤皤終始三朝無玷可磨

一一疏圖贊

宋 蘓 軾

惟天為健而不干時沈潛剛克以變和之於赫漢高以智力
王凜然君臣師友道喪老且中興以法馭人殺盡韓楊蓋三
良臣先生憐之振袂脫屣使知區區不足驕士此意莫陳干
載於今我觀畫圖涕下沾襟

孔北海贊

併序

宋 蘓 軾

文舉以英偉冠世之資師表海內意所予奪天下從之此人
中龍也而曹操陰賊險狠特鬼蜮之雄者耳其勢決不兩立
非公誅曹則曹害公此理之常而前史乃謂公負其高氣志

在靖難而才疎意廣訖無成功此蓋當時奴婢小人論公之語公之無成天也使天未欲亡漢公誅曹若殺狐兔何足道哉世之稱人豪者才氣各有高卑然皆以臨難不懼談笑就死爲雄操以病亡子孫滿前而啾嚶涕泣畱連妾婦分香賣履區處衣物平生奸僞死見真性世以成敗論人物故操得在英雄之列而公見謂才疎意廣豈不悲哉操平生畏劉備而備以公知天下有已爲喜天若祚漢公使備備誅曹無難也予讀公所作楊四公贊歎曰方操害公復有魯國一男子慨然爭之公庶幾不死乃作孔北海贊曰晉有羯奴盜賊之靡欺孤如操又何所耻我書春秋與齊豹齒文舉在天雖亡不死我宗若人尙友于祀視公如龍視操如鬼

王元之贊

并序

宋 蘇 軾

傳曰不有君子其能國乎予嘗三復斯言未嘗不流涕太息也如漢汲黯蕭望之李固吳張昭唐魏鄭公狄仁傑皆以身殉義招之不來麾之不去正色而立于朝則豺狼狐狸自相吞噬故能消禍於未形救危於將亡使皆如公孫丞相張禹胡廣雖累千百緩急豈可望乎故翰林王公元之以雄文直道獨立當世足以追配此六君子者方是時朝廷清明無大姦慝然公猶不容于中耿然如秋霜夏日不可狎玩至于三黜而死儻不幸而處于衆邪之間安危之際則公之所爲必

將驚世絕俗使斗筲穿窬之流心破胆裂豈特如此而已乎
始予過蘓州虎邱寺見公之畫像想其遺風餘烈願爲執鞭
而不可得其後爲徐州而公之曾孫份爲兗州以公墓碑示
予乃追爲之贊以附其家傳云
維昔聖賢患莫罕知公遇太宗允也其時帝欲用公公不少
貶三黜窮山一死靡憾咸平以來獨爲名臣一時之屈萬世
之信紛紛鄙夫可拜公像何以占之有泚其頽公能泚之不
能已之茫茫九原愛莫起之

管寧贊

宋 蘓 轍

序曰余自龍川以歸居穎已十有三年杜門幽居無以自適
稍稍取舊書閱之將求古人而與之友蓋於三國得一焉曰
管幼安蓋幼安少而遭亂渡海居遼東三十七年而歸結於
田廬不應朝命年八十有四而沒功業不加於人而余獨何
取焉取其明於知時而審於處已云爾蓋東漢之衰士大夫
以風節相尙其立志行義賢於西漢然時方大亂其出而應
世鮮有能自全者穎川荀文若以智策輔曹公方其擒呂布
斃袁紹皆談笑而辦其才與張子房比然至九錫之議卒不
能免其身彭城張子布忠亮剛簡事孫氏兄弟成江東之業
然以直不見容力爭公孫淵事君臣之義幾絕平原華子魚
以德量重於曹氏父子致位三公然曹公之殺伏后子魚將

命至破壁出后而害之汝南許文休以人物臧否聞於世晚
入蜀依劉璋先主將克成都文休逾城出降雖卒以爲司徒
而蜀人鄙之此四人者皆一時賢人也然直已者終害於身
而枉已者終喪其德處亂而能全非幼安而誰與哉舊史言
幼安雖老不病著白帽布襦袴布裙宅後數十步有流水夏
暑時築杖臨水盥手足行園囿歲時祀其先人絮帽布單衣
薦饋跪拜成禮余欲使畫工以意髣髴畫之昔李公麟喜畫
有顧陸遺思今公麟死久矣恨莫能成吾意者姑爲之贊曰
幼安之賢無以過人余獨何以爲賢賢其明於知時審於處
已以能自全幼安之老歸自海東一畝之宮閉不求通白帽
布裙舞雩而風四時蒸嘗饋典必躬八十有四蟬蛻而終少
非魏人何以命之天之逸民

夫子贊

宋米芾

孔子孔子大哉孔子孔子以前既無孔子孔子以後更無乳
子孔子孔子大哉孔子

聖櫓贊

宋米芾

煒東皇養白日御元氣昭道一動化機此櫓植矯龍怪挺雄
質二千年敵金石紀治亂如一夕百代下蔭圭璧

臧僖伯贊

明方孝孺

戡禍彌亂世貴乎兵兵之所加治其旣形心術之微禍亂所

自孰能治之諫臣之事在昔魯隱矢魚於棠其事雖微其志已荒有臣僖伯憂其漸懈昌言正色以訓以戒天稔其禍聞善不為鍾巫之難實兆於斯聖之求諫匪曰觀美羣情既宣萬事畢理自以為智厭棄人言纂弒將行至死不聞諫之不用鮮不忘國我思若人中古遺直

孟獻子贊

明方孝孺

世無材智不過於削非有仁人何以為國魯號多士粲乎有文穆穆獻子其德可專用侈國貧言利愈密宣成之間苛政橫出夫子是悼勢莫止之昌言在人後世紀之乘馬之微鷄豚不畜富有天下恒患不足古稱盜臣或以為才我懷夫子莫知我哀

子臧贊

明方孝孺

恒人於利錙銖必競亦獨何心力讓于秉仁義可樂名節可尊肯取瓦礫棄遺璵璠纂弒紛紛孰非臣子先生醜之恐其污已高不忘世潔不亂倫大鎮社稷為曹宗臣秦楚有王雄霸中國戰不足稱千載汗辱去彼取此疇能與偕以利易生彼何人哉

子家羈贊

明方孝孺

魯有盜臣擅國自恣昭公寡謀躁以失位遜齊居晉淹恤八年惟子家子奉以周旋自有可為謀猷甚遠拒而不從卒以

喪返使用其言動合事機豈其終身棄國不歸久而彌恭困
而無怨義不近名忠不避難考德千載難乎其全夫子之節
允也可傳晉文五臣世嘉其績彼也以才夫子以德

諸葛武侯贊

明方孝孺

漢治任法難乎大臣惟忠武公千載一人綜覈萬變以義而
動虎躍龍驤天下震恐極其智能亂不足平天實厄之大勲
無成成敗紛然處之甚暇論其所存伊呂流亞古學不傳士
氣益卑公心不忘百世之師

張詠贊

明方孝孺

爲政匪難患才之卑才優於事乃克有爲惟忠定公萬夫之
傑屢剖郡符有聲烈烈威惠所被梁益其尤坐鎮西南分天
子憂時其寬嚴陽舒陰慘談笑指麾奸強破膽豈惟善政可
配古人卓行危言爲世名臣將相無功名隨身逝誰能使民
廟祀百世乘風騎尾公神在天嗟彼儉邪敢執公鞭

七忠贊

明周應治

鐵鉉維物堅剛孰有逾鐵公以系姓豈天植耶見事風生
讞獄電決見器高廟才節昭揭薇垣餉師水陸不忒城守東
藩旣破復飭懸板幾中淮陽逐北中原寒心北平失色詎知
天授大內自焚豈不戴天心戀舊君顧盼難得妻子奚論雖
膏鼎鑊忠稱帝閣舊國有憾故園無家女亦貞義有識共嗟

雄才揮霍勁節孔嘉磨光日星撐持岱華

陳迪 有歿而光有生而缺蘭蕤芳存玉碎晶裂猗與少保

翫體不羣起家辟召通籍詞林惠流海岱威著南溟文昌八

座眷亦殊焉受知國士為殷頑民一醮靡改九死不臣身同

子磔名共日赫氣壯山河血化萋碧雨水明鏡雙橋落虹有

祠峩然騰肅高風媿彼奸諛醜顏二天畹陵猶生玉潔蘭荃

胡子昭 靖難入繼自其家事事非瞻烏何謂就義原本皇

祖精忠豎幟三十年間雷厲颺淬公性耿介希古同流獻賦

蜀都較史天球麾招莫動淮南寢謀豈有他腸各為分憂大

物既改有力負舟株連繩引死又何求上酬國恩下謝從遊

蜀有專祠各有遺休丹心皓月萬古清秋

丁志芳 泉不歸山雨不上天冰霜隨化金石謝堅丈夫正

氣獨往無前栗烈堅剛有折靡遷公起甲科委質革朝風高

烏府聲著吳橋同時黃練共効賈晁刻核太至烽燧是挑北

平日張境土日蹙一木莫支嚮師而哭豈不能去鼠竄是惡

豈不能臣鴟張其腹潛遣妻子獨以身留我頭可截我節自

道節俠惠文氣結蜃樓仁必有後天不謬悠勇足報主智能

全嗣埒彼鴟夷託後齊使龐復為丁忠且蒙謚赫赫御史智

勇且備

高巍 惟辯襄節推孝移忠遼州既孝艾母何豐錄用先朝

建白摩空分王諸王晁策賈衷書請罷兵射燕遺風從戎南
潰羈旅于東墨守濟南與鐵同功寧不如烏胡集于枯臣哉
鄰哉艱難是扶豈如弁髦倣因改圖詬彼管魏自甘溝塗水
心一賦慷慨丈夫高山可仰青簡不污

鄭華 有域景隆殊寵專征金川失守賈主逢迎彼狡童俊
鎮江專城一矢未遺首豎降旌行人散地判官下陳東平未
蒞癘然經生驅車難就天為震驚力疾戰死力獲瓊瑛螳怒
胡益犬吠見貞彼李童子人面強行孤忠論定仁廟有評誰
曰傷勇振古之英

王省 秩不必宗祿豈在臚恤緯憂深懷沙心苦秉鐸雖微
風教是主祿焉避難罷士儔伍齊黃之死難端目紐其他族
類皆繇掣肘非公生亂何嫌何咎升斗君粟抱關君守明倫
大呼觸柱碎首烈峻文山清徹濟瀏祇成個是遑恤死所汨
羅首陽同此遐舉

孟母祠贊

明 鄧原忠

古有胎教實謹厥初生焉而長學可緩歟學也者師古訓是
式日就月將允有令德懿惟孟母克教厥子始而三遷慎厥
攸止賢哉子輿孔孫是師師訓惟謹母言敢違母也惟賢斷
機以喻中途輟學曰猶此故斷機難緒輟學曷成緝之熙之
底於光明人誰無母克教者稀間或有焉孰喻以機父而教



子且有未全矧爲母者教何能專有母若孟厥子乃賢有子
若孟母德著焉知言養氣亦克允蹈教明性學治闡王道入
心斯正楊墨斯闢三聖是承允矣宏績著書七篇垂訓遠而
不有賢母曷克若茲峩峩嶧山鍾靈發祥曰古邾國苗裔其
昌斷機有碑曝書有臺肯構肯堂期爾後來我矢厥詞銘于
堅石世爲母者是傲是則

聖賢贊

有碑在歷城縣學

明 陳鳳梧

伏羲贊 於惟神聖繼天立極仰觀俯察卦爻斯畫始造書
契以代結繩開物成務萬古文明

神農贊

聖皇繼作與天合德始嘗百草以濟天札農有耒

耜市有交易澤被生民功垂無極

黃帝贊

帝德通變神化宜民垂裳而治上乾下坤井野分

州迎日推筴百庶惟熙萬世作則

帝堯贊

欽明揖遜德協萬邦巍乎成功煥乎文章天地之

文日月之光允執厥中道冠百王

帝舜贊

重華協帝授受於唐惟精惟一濬哲文明兩階千

羽九韶鳳凰恭已南面萬世綱常

禹王贊

文命四敷三聖一心有典有則克儉克勤成功不

伐善言則拜九州攸同萬世永賴

湯王贊

勇智天錫聖敬日躋建中於民萬邦惟懷顧諟明

命肇修人紀垂裕後昆道統斯啓

文王贊 文德之純於穆不已肅肅雝雝緝熙敬止後天八

卦昭如日星大哉易繫式開太平

武王贊 丕顯文謨丕承武烈偃武修文天下大悅丹書之

受洪範之咨百王遺緒一代丕基

周公贊 天生元聖道隆德備制禮作樂經天緯地上承文

武下啟孔顏功在萬世位叅兩間

孔子贊 道冠古今德配天地刪述六經垂憲萬世統承義

皇源啟洙泗報德報功百王崇祀

顏子贊 天稟純粹一元之春精金美玉和風慶雲博文約

禮超入聖門百王治法萬世歸仁

曾子贊 守約而博學恕以忠聖門之傳獨得其宗一貫之

旨三省之功格致誠正萬世所崇

子思贊 精一之傳誠明之學聖門嫡派斯道有托發育洋

洋鳶飛魚躍慎獨之訓示我先覺

孟子贊 哲人既萎亞聖斯作距詖闢邪正論諤諤堯舜之

性仁義之學烈日秋霜泰山喬嶽

藝文八 頌

漢成陽令唐扶頌

君諱扶字正南潁川鄆人也其先出自慶都感赤龍生堯王
 有天下大號為唐洽致雍熹尊天重民禪位虞舜光炙茅土
 通天三統苗胄枝分相土脉君因氏唐焉累取含祚受天之
 祐印嗣彌光為漢臺輔君父孝廉郎中早卒季父蜀郡蜀郡
 從弟會稽會稽從弟南陽君從兄東萊太守南陽弟司空公
 在朝透隨正色竭忠為國討暴六侯俱封受土襲爵金縉十
 三君繼厥緒少有岐嶷耽道好古讀書咏詩綜緯河雒底究
 羣典彋紐上進守舞陽丞弱冠守昆陽尉潁陽令隱練州郡

所臨有迹帝嘉其德特拜郎中察能治處除豫章鄆陽長夷
粵拊摠忭強難化君奮威颺武視以好惡蠻貉振疊稽顙怖
服 上前逋千有餘萬盜賊衰息境界晏然三載有成州郡
詳表遷成陽令承先聖之弘軌見讚像之高蹤遂興無爲之
治優賢颺歷表善絀惡遵九德以綏民崇晏晏之惠康風移
俗易莫不革心朝有公卓家有參騫分邾之治復隆 君

追惟堯德廣被之恩依陵臺廟造立授堂四遠童冠握衣受
業著錄千人朝益暮習衍衍閭閻尼父授魯曷以復加靈祇
瑞應木連理生白菟紫鳩游君園庭蕩蕩之治莫能名焉三
司察功朝庭審真以君威恩並流文武兼興東萊海濱須君

以寧詔書換君昌陽令吏民慕戀士女惟艱捺率君車輪不
得行君臣流涕道路琅玕迥有詔命靡由復還於是故從事
仲宇仲授張躬萬龍督郵仲規郡掾閭葵等乃共刊石樹頌
歌君之美其辭曰赫赫唐君帝堯之苗氏族不一各任所安
本同末異蓋謂斯焉君體煥炳有芴有聲如山如 如不

傾如 如海澹如 惟直如矢秉銓據衡在朝肅肅閨門
雍雍廉踰伯叔潔如珪璋賦政於外爰及鬼方淮夷來降寇
賊遂亡黎庶攸寧黔首歡康以德綏撫宣恩六陽以仁恤弱
以義抑強恩由春夏威如秋霜賞罰分審白黑著明憂者閔
雅不侮寡矜航樂道術咀嚙七經五六六七訓導若神接下

施與投財如損吏服其德民歸其恩父父子子君君臣臣不
師自舉不拘不煩囹圄空虛國無佞民德及草虫澤流無垠
娟飛蠕動咸賴我君顯顯令稱德音常存

几碑內殘缺字
莫攷空白如右

宓子賤頌

唐賈至

清淨致理中庸之德至高明柔克簡易之體大繹微旨而徵
遺論何先生道蔚其葳蕤者乎先生宣慈在躬精義入神德
順乎天性根於人殷其如雷曖然如春始受業於仲尼終委
質於魯君爾乃周道陵遲王風衰息吳楚竊於位號于戈亂
於原野則我魯國無齊晉之強定哀非桓文之主三卿有僭
虐之政先生處此亂邦從容理邑平心氣而全耳目晏然躋
富壽之域焉自非知微知彰變化無窮孰能臻此觀夫爲政
之大體元之要卹孤哀喪舉士問弔訓之以悌加之以孝借
五更而悟君賢三老而稟教然後燕居以佚其體張樂以和
其人夜漁不戒而信欺吏不威而息是以宣尼惜君之理小
子期間君之政暇何其遠哉向使移於有國之君則陶唐之
理也施於有政之臣則二南之化也昔舜左禹而右臯陶不
下席而天下理周公殺膳在御不解懸而四夷伏小大則異
其揆則同天寶初至始以校書郎尉於單父想先生行事徵
其頌聲而古碑殘缺苔篆磨滅使立志之士何以挹其遺風
焉嗚呼其道存而其事往其人亡而其政息哀哉遂作頌曰

鳴琴湯湯宓子之堂清淨無爲邑人以康澆風化淳霸俗致
王誰謂陽鱗革而爲魴鱣黃髮或師或友芄芃麥苗不稂
不莠齊師已郤魯俗斯阜諫或剖心伊人引肘穆穆伊人希
聖之才堯舜旣往孰爲來哉從時卷舒與道徘徊游泳孔門
取容定哀泱泱千古顯顯令德聲隨悠沒惠與順息人亡政
敝道播神默寂寥夜川惆悵舊國荒祠尙掃苔篆將磷尋風
聆韻想見其人年代邈殊精誠闇親再表貞石頌聲維新

裴公德政頌

唐孫述

昔太公之理齊也尊賢知尙有功泱泱大風千載不泯石慶
古之良相也臨淄社焉于公古之良吏曹也東海祠焉裴公
今之良太守也濟北頌焉今古一揆謂之齊志苟非其人爲
大僞焉君子是以知裴公之爲政有異能矣初公以甲子歲
秋八月蒞於是邦祇適明命弘敷令典教之訓之養之育之
俾夫闔境之內靡清風漸膏雨醉純德飽話言若卜筮之是
孚如草木之允殖用克畏慕升于大繇其明年也皇帝東巡
狩至岱宗自洛及兗於皇時邁雷轂萬乘雲旂千里供帳於
東道者凡十有六州焉大或數圻次或萬井中產者輕幣膏
梁者倍征方事之殷猶懼不給茲郡褊小實難圖也公淵然
深識卓然遠謀擇利而行慮善以動西自於陽臺谷東晉於
長清造舟爲三橋置騎爲驛闢野爲兩傾除道爲九達或總

或秭或薪或榘或饗或餼或糧或糗爨之蹠蹠積之粟粟其崇如墉其比如櫛皆先之以方畧備之以生聚因吏祿之奇贏雜官用之餘羨通變合度豐省中程編戶之民秋毫勿與繇是邑無征令鄉無斂法賈不利於乘急農不傷於甚賤且狎其野而安其業人所謂勤而不得施而弗費雖小必濟不亦宜乎抑又聞之居簡則易於德綏處煩則難於柔克大抵皆是其誰不然公始自知供迨于卒業不鞭一卒不貫一吏繩責勿用鐫譙無施禮以生其恭悅以盡其力役不兩令事無後期雖子文治兵之舉叔敖城沂之政類能比德曷足稱多泊金輿反旂旌別淑慝監頓史劉曰政勸農使盧怡竝奏

公理行第一議者以爲當矣其三年秋大水河堤決諸郡有聞皆俟詔到莫敢興役害因滋甚時公以爲執事諉上者非奉公之法也便文自營者非盡忠之計也亦旣成奏因而發卒播告厥指卒顙於人荷鍤者襁屬負圖者麀至從公于邁祁祁如雲公俯臨決河躬自護作雨不張蓋塵不振衣饋不致鮮寢不處館蔬食以同其烹飪野次以同其燥爆版築競勸馨鼓弗勝克鞏而成匪亟而速以浹旬之役興百倍之利澹災革弊人到於今賴焉古之所謂敏則有功豈虛言矣公之方在河上也有執訊者傳詔命公爲宣州刺史公悼其功之不成且懼人之體怠未卽宣布周之密之公撫巡如初訓

勵不輟及堤役既畢國人皆賀公於是解印出次啟籥見書
莫不瞿然而駭曰不虞公去之速也嗚呼曷歸乎旣而幢檠
就國干旛守途野有輟耕巷無服馬男女以辨號泣相望或
觴於郊或餞於境扶服遮道沮瀾駐車莫肯旋歸迨過信宿
夫所居人富所去見思前史以爲有德君子之遺風猗嗟裴
公蓋有之矣公名耀卿字渙之河東聞喜人祖某皇朝亳州
鄆縣令父守貞皇朝成寧二州刺史贈晉州史又贈州都督
階受祉必大垂裕不朽彰徹簡冊布昭令聞其緒業有如此
者公之昆友故冀州刺史子余等六人俱以儒行達天下之
人謂之六龍公之自出今屯田員外郎韋述等七人俱以才
名進天下之人謂之七子其族姻有如此者公覃訏有聲鬻
齒克類公侯表於龜筮詩禮成於小學八歲神童擢第則已
殊於公路矣丕髦之後尤遠於文長安中則天首命有司考
試調集之士而第其詞高下公以甲科受祕書省正字異其
對也睿宗之在藩邸精選僚屬公爲典籤兼掌文翰愛其才
也其藝文有如此者頃之遷國子主簿試詹事府丞歷河南
丞曹叅公考功員外郎除右司兵部二郎中自長安令臨此
郡自宣城守改冀州公歸爲政不移於故迹延壽理人亟登
於高第入拜戶部侍郎今爲左庶子其閎闊有如此者若乃
邁德由已全誠自衷出入孝弟周旋禮樂幅利以儉葆光以

和仁而有剛直而不倨微妙析理入於無間清明開物周於
有象享茲具美可謂大賢其庇身也弘矣其所憑也厚矣詩
曰敷政優優百祿是遒又曰君子萬年介爾景福夫如是欲
辭福祿其可得乎方當彌綸帝績豈徒潤色吏事而已盧縣
父老某等懷公之惠不可彌亡私欲銘德頌美計功稱代以
予國之史臣也學於春秋褒貶之義乃因邑子校書郎衛憑
假詞不能徵拙于我事 詳實言多遺恨著循吏之傳願守
文翁述野馬之詩慙非史克詩曰瞻彼濟矣湜湜其沚有斐
君子令聞不已帝省其方和鸞中央務穡常布駿惠我王我
隰旣溢我民旣卹成之不日有始有卒黃髮番番飲公之和
矢詩不多雜以遂歌

庾公德政頌

唐李陽冰

荀藐古之良宰也榆次碣之庾公今之賢百里也龔邱頌之
議者謂庾公之政大矣公初告羣吏曰昔孝宣憂元元以爲
經國理政先乎令長乃擇郎官御史出宰縣邑我自任城尉
驟居五百石非才何以當之誓務整蕪疲人祇若明命乃崇
禮讓省刑罰紓力役闢土地宣慈務寬訓儉示德潤作時雨
和爲春風於是齊魯丕變井閭咸復三載考績一方歸最都
督兼御史清河張公曰是牧伯之賢也訓俗馭官勸直沮枉
述職之地數能稱之曰方諸爽氣日暮更清比之松筠歲寒

轉茂題以上下之目出乎羣英之表百城千里異聲同歡曰
以伯達之良牧賞次孫之茂宰宜矣公名賁字文明其先穎
川人成周之時世爲掌庾因以命族公其胄焉公之考曰欽
嗣爲兗州別駕王父曰元主爲尋陽令曾王父曰師則爲蜀
王文學楷模繼代龜麟接武大曆中邑老鼓滔等三十五人
以公政務之大咸願刻石褒美申於元戎元戎允答縣人以
湯冰與公周旋備詳德行俾之作頌有愧能文辭曰於穆庾
公宰守之良化洽百里風播一方邑老上請願言頌德元戎
嘉之石金乃刻大曆五年九月三日建

慶曆聖德頌

并序

宋石介

二月二十一日大昕皇帝御紫宸殿朝百官相得象殊拜竦
樞密使夷簡以司徒歸第二十二日制命昌朝參知政事弼
樞密副使二十六勅除修靖素並克諫官四月八日皇帝御
紫宸殿朝百官衍樞密使仲淹琦樞密副使乃用御史中丞
拱宸御史邈御史平諫官修靖十一疏追竦樞密使勅十三
日勅又除襄爲諫官天地人神昆虫草木無不懽喜皇帝退
姦進賢發於至聰動於至誠奮於睿斷見於剛克陟黜之明
賞罰之公也上視漢魏隋唐五代几千五百年其間非無聖
神之主盛明之時未有如此選人之精得人之多進人之速
用人之盡實爲希闕殊尤曠絕盛事在皇帝之德之功爲卓

竚瑰偉神明魁大古者一雲氣之祥一草木之異一蹄角之怪一羽毛之瑞當時羣臣猶且濃墨大字金頭鈿軸以稱述頌美時君功德以爲無前之休丕天之績如仲淹弼實爲不世出之賢求之于古堯則夔龍舜則稷契周則闕散漢則蕭曹唐則房魏陛下有之諸臣亦皆天下之人望爲宰相管官者陛下盡用之此比雲氣草木蹄角羽毛之異萬萬不侔豈可翻無歌詩雅頌以播我君之休聲烈光神功至德刻於琬琰流于金石告于天地奏于宗廟存于萬千年而無窮盡哉臣實差之臣嘗愛慕唐大儒韓愈爲博士日作元和聖德頌千二百言使憲宗功德赫奕煒昭于千古至今觀之如在當日陛下今日功德無讓憲宗臣文學雖不逮韓愈而亦官於太學領博士職歌詩讚頌乃其職業竊擬于愈輒作慶曆聖德頌一首四言凡九百六十字文辭俚鄙固不足以發揚臣子之心亦欲使陛下功德煒燦昭于千古萬千年後觀之如在今日也臣不勝死罪臣賤無路以進姑藏諸家以待樂府之採焉

於維慶曆三年三月皇帝龍興徐出闡闡晨坐太極晝開闔闔躬攬賢英手鋤姦枿大聲颯颯震搖六合如乾之動如雷之發昆虫躡躅妖怪藏滅同明道天地嘉吉初聞皇帝蹙然言曰予父予祖付予大業予恐失墜實賴輔弼汝得象殊

重慎微密君相予久予嘉君伐君仍相予笙鏞斯協昌朝儒者學問該洽與予論政傳以經術汝貳二相庶績咸秩惟汝仲淹汝誠予察太后乘勢湯沸火熱汝時小臣危言業業爲予司諫正予門闌爲予京兆望予讒說賊叛于夏往予式遏六月皓日大冬積雪汝暑汝寒同于士卒予聞辛酸汝不告予晚得弼予心弼悅弼每見予無有私謁以道輔予弼言深切予不堯舜予自笞罰諫官一年奏疏滿篋侍從週歲忠力盡竭契丹亡義檣杙饗餐敢侮大國其辭慢悖弼將予命不威而懼卒復舊好民得食褐沙磧萬里死生一節視弼之膚霜剝風裂觀弼之心鍊金鍛鐵寵名大官以酬勞渴弼辭不受其志莫奪惟仲淹弼一夔一契天實賚予予其敢忽並來弼予民無瘥札曰衍女來汝予黃髮事予二紀毛禿齒豁心如一兮率履弗越遂長樞府兵政無蹶予早識琦琦有奇骨其器魁樞豈視居楔其人渾樸不施剗劂可屬大事敦厚如勃琦汝副衍知人予哲惟修惟靖立朝讞讞言論礪礪忠誠特達祿微身賤其志不怯嘗詆大臣亟遭貶黜萬里歸來剛氣不折屢進直言以補予闕素相之後含忠履潔昔爲御史幾叩予榻至今諫疏在於箱匣襄雖小臣名聞于徹亦嘗獻言箴予之失剛守粹慤與修儔匹並爲諫官正色在列予過汝言無鉗汝舌皇帝明聖忠邪辨別舉擢俊良掃除妖魃

衆賢之進如茅斯拔大奸之去如距斯脫上倚輔弼司予調
燮下賴諫諍維予紀法左右正人無有邪孽予望太平日不
逾浹皇帝嗣位二十二年神武不殺其默如淵聖人不測其
動以天賞罰在予不失其權恭已南面退姦進賢知賢不易
非明不得去邪惟難惟斷乃克明則不貳斷則不惑旣明且
斷惟皇之德羣下踧踖重足屏息交相告語曰惟正直毋作
側僻皇帝汝殛諸侯危慄墮玉失舄交相告語皇帝神明四
時朝覲謹修臣識四夷走馬墜鐙遺策交相告語皇帝神武
解兵修貢永爲屬國皇帝一舉羣臣懾焉諸侯畏焉四夷服
焉臣願陛下壽萬千年

附 頌後

郊祀對

漢 董仲舒

廷尉臣湯昧死言臣湯承制以郊祀事問故膠西相仲舒臣
仲舒對曰所聞者古天子之禮莫重于郊郊常以正月上辛
日者所以先百神而最居前禮三年喪不祭其先而不敢廢
郊郊重于宗廟天尊于人也王制曰祭天地之牛角繭栗宗
廟之牛角握賓客之牛角尺此言德滋美而牲滋微也春秋
曰魯祭周公用白牡色白貴純也帝牲在滌三月牲貴肥潔
而不貪其大也凡養牲之道務在肥潔而已駒犢未能芻秣
之食莫如令食其母便臣湯謹問仲舒魯祀周公用白牡非

禮也臣仲舒對曰禮也臣湯問周天子用騂剛羣公不毛周公諸公也何以得用純牲臣仲舒對曰武王崩成王幼而在襁褓之中周公繼文武之業成二聖之功德漸天地澤被四海故成王賢而貴之詩曰無德不報故成王使祭周公以白牡上不得與天子同色下有異于諸侯臣仲舒愚以爲報德之禮臣湯問仲舒天子祭天諸侯祭土魯何緣以祭郊臣仲舒對曰周公傳成王成王遂及聖功莫大于此周公聖人也其郊何用臣仲舒對曰魯郊用純騂剛周色尙赤魯以天子命郊故以騂臣湯問仲舒祠宗廟或以鶩當鳧鶩非鳧可用否臣仲舒對曰鶩非鳧鳧非鶩也臣聞孔子入太廟每事問慎之至也陛下祭躬親齋戒沐浴以承宗廟甚敬謹奈何以鳧當鶩鶩當鳧名實不相應以承太廟不亦不稱乎臣仲舒愚以爲不可臣犬馬齒衰賜骸骨伏陋巷陛下乃奉使九卿問臣以朝廷之事臣愚陋曾不足以承明詔奉大對臣仲舒冒死以聞

化民有道對

漢東方朔

堯舜禹湯文武成康上古而帝經歷數千載尙難言之臣不敢陳願近述孝文皇帝之時當世耆老皆聞見之貴爲天子富有四海身衣七綈足履革舄以韋帶劔莞蒲爲席兵木無

刃衣縕無文集上書囊以爲殿幃以道德爲麗以仁義爲準
於是天下望風成俗昭然化之今陛下以城中爲小圖起建
章左鳳闕右神明號稱千門萬戶木土衣綺繡狗馬被績罽
宮人簪璫瑋垂珠璣設戲車教馳逐飾文采叢珍怪撞萬石
之鐘擊雷霆之鼓作俳優舞鄭女上爲滛侈如此而欲使民
獨不奢侈失農事之難者也陛下誠能用臣朔之計推甲乙
之帳燔之於四通之衢卻走馬示不復用則堯舜之隆宜可
與比治矣易曰正其本萬事理失之毫釐差以千里願陛下
留意察之



